

Basef Ifimba Pol Nanda'ef Fagafe'ma Taitusi

Basef bandafi Pol nanda'ef fagafe'ma Taitusi

1:1-4 Pol na'ipa Taitus basef bu'wafi ma God noloma Jisas Krai
nogatopalopana

1:5-16 Pol na'ipa Taitusa nondandepa anom agufumi siosi nonda'am
walemb hielimbi esis Kristen sagapoma

2:1-3:11 Pol na'ipa Taitasa nogawalipasa basef Godi kofagefa endilisifi
atifa hapifi poe esis Kristeni

3:12-15 Basef akutaifi

1 ¹Ae' Pol anda' maola Godi ea' ae' aposel Jisas Kraisi. Anen nandandepa ea' ma igawalipasa basef ananifi. Anen nasapa'e ma egewa' banaga esis amam nematawa mamahisa nandandepas ea' ananisii ma etopalopas sohapifana sogogawa basef endilisifi ma sigaila waf ananifi.^a ²Ae' anda' maola agatopalopa hapif asasini ma esis sogawa ma sonohas sope sogohafa ambal alamba namili sogape andeande' lifilafi. Fowa' gani God ata' owa' nonda' anin mae netaga itap apa'ea, anen a' nali' na'ias ea' ma nogaso'apa ambal alamba apa'. Anen ina nagambaso'ami, owa'atin.^b ³A'i owa' main, nogota atamba anen atona nandandepata ea'i, anen a' nasa'ma amam amamba mogawalapa basef ananifii alihif. God anen nofa' apa' mogotanimai, anen na'ias ea' dei' nase'e maol inimba ma egawalapa basef ifimba.^c ⁴Ae' anda' basef ifimba fafe'mago ina' Taitus. Ina' nahapifa God ea' na'amba atin si'i apa' hiapai magahapifana. Isimba atis dei' ina' nogame ae'inai endilisi. Ae' a'i God ahamapa noloma Krai Jisas anen nofa'apa mogotanimai, amom biam motopalopena dowaf nembel ine'imbili bepe sa'ombel.

a 1:1 Kl 1:27 **b** 1:2 Ef 1:9-10; Ta 2:10, 3:4; 1 Ti 1:1,11 **c** 1:3 2 Ko 8:23; Ga 2:3; 2 Ti 1:2, 4:10; Ro 1:7

Basef amom agufumi mugumafi esis Kristeni

⁵Ae' akwahina napani Krita negandondomba maol inimba ata' owa' nimbifana ma atiasi nendandepa anom agufumi mugumafi esis Kristeni walemb hielimbi, si'i fowa' aga'ipina. Ea' basef amamifi fagape na'amba.^d ⁶Anona aman i'i owa' nonda' anef waf awafima naep esis amam nematawaia, ma anen noso' nemata'w atoto'w ma batawisana ananisi sohapifa Kraisi esis basef akasa, esis ina sonda' anef waf awafi, esis batawis sope andeande' sogame' basefi, dao' amom monda' waf na'ambai. Ina' nonda'am mope agufumi.^e ⁷Ina' negawa agufumi mugumafi esis Kristeni, amom mugumafi maol Godi. Ea' amam amambai fe' poe amamini andeande'ma atiasi esis amam nematawa ina solomam siti anef waf awafi amamifi, owa'atin. Anona aman ama amom agufumi, anen ina a' nonda' du'waniga, a okom wandafuna kwafalis, owa'. Anen ina nea' embel nohaga nogaol nohas atin, owa'i. Anen ina okom mohafel mi'imi'i a'owa' ma monda' waf awafi ma mogofa' otamba, owa'atin. ⁸Anen nundumafi epes isimba mamahisa sugafi'i laugunii analemb walembi. Anen okom munda'i waf fasifi atef. Ea' nomonas sopaona mundumafi alop andeande' datima. Ma anen nigaila waf fasifi hiafi Godi ea' nope hilili'. Anen nundumafi okom ananiami atom datima andeande'.^f ⁹Anen nondahapila basef ifimba bu'wafi apa' magawalipasafi andeande'. Ea' anen la'ifinama nuwalipa anis epes nosa'ma ukup asasipi nogowa' banagasa basef ifimba usi'ifi. Ea' la'ifinama niga'ipa isimba sogosambala basef usi'ifii ma sogameme'ma basef asasifi ina endilisifi, owa'atin.^g

Anin ailan Krit anis epes sagambaso'ami sape

¹⁰Aho', epes hiasi ina sagi'ma basef, owa'. Sosambalif. Esi sanda' basef dowaf sa'iam sambaso'ma anis epes. Esi hiasi wambota Judai sagatopa' alopi.^h ¹¹Esi sandanda' na'ambai, esis sa'i sombaso'mas sogofa'asa otamba moni mais anis epesi. Ea' sawalipa anisa waf afamba apa' mandaiwa'mafi. Esi sanda' waf afambai atef dei' sahambombaga wambotagw epes hiasi. Ea' ina' nesopama malogof asasigufi isimba sanda'am na'ambai. ¹²Fowa' anona aman Kritinai anen gawainai si'i profet, na'ias na'amba na'i, "Fowa' gani endilisi, esis Krit sape epes sagambaso'ami ea' dei' wapani ata' sape na'amba atin. Esi si'i mafis magail alupi awami. Ala'uta nahas a'owa', tol sa'oh dowaf ea' sa' gwa'aimi hiami."ⁱ

¹³Basef ifimba endilisifi. Ea' ina' nenda'epasef dindinipa, seme'ef sogogawa endilisi waf awafi asasifi ma ata' sogambema nelelemb. Ama

d 1:5 1 Ti 3:2-7; 2 Ti 2:24-26 **e** 1:6 1 Ko 4:1 **f** 1:8 2 Ti 4:3; Ta 2:1 **g** 1:9 1 Ti 4:7
h 1:10 Jo 10:12; 1 Pi 5:2; 2 Ti 3:6 **i** 1:12 2 Ti 4:2

hapif asasini ata' netaga negafe' usi'in.^j ¹⁴ Ama esis sogakwaha basef mamimami falafumi esis Judai ma mu'uli epes isimba sogowa' alafugaha basef endilisifii.^k ¹⁵ Ukup epes isimba nelelemb usi'ilimba waf fasifii, hiahawes hiasi hi'alas bo'wes hilili' ma esis. Apa' nomonas epes isimba nelelemb awasilimbi ma esis owa' soghapifa Kraisia, opalef asasilifi owa' anin mae be'ena, owa'atin. Ukup asasipi paloma malogof fagape opalef asasilifi nomoni a' awasim a'owa'.^l ¹⁶ Malogof asasigufi saga'ias na'amba sa'i, "Apa' mogawa God." Apa' fe' asasini, nawalapa esis sogowa' alafugaha Godi. God anen nandaiwa'ma esis endilisi. Epes isimba sogasambala basefi, ina la'ifisa atiasi sonda' anef waf bu'wafi, owa'atin.

2 ¹ Apa' ina' ninda'ipa esis amam nematawa ma basef fasifi ma waf asasifi findaila basef ifimba usi'ifi. Ina' niga'ipas na'amba.^m

Basef amam nematawa isimba hagasio

² Amam hagami owa'i mea' embel mohaga mogaola. Amom ukup pendanda' andeande'ma waf usi'ifi hilili'i ea' nomonas sopaom mundumafi alop andeande' datima. Amom mondape andeande'ma hapif amamini negape bo'wen atina waf afamba ukup pandaimafi a waf afamba ukup pigaila Godafi a waf afamba pigalutu banagepa ma nimanimi hiami.ⁿ

³ Ea' awo nematawa hagiwai wapani ondape' usi'iwa hilili'. Awo owa'i ondaha basefa anis unda'lipamasa, owa'. Awo owa'i wea' embel hiambeli ohaga ogaola. Awo ondape si'i tisa nagawalipasa waf bu'wafi. ⁴ Awo hagiwai wihimba'ma nematawa awamba ata' sa'uwai kwasakwasalai ma onda' waf na'amba. Ukup awaupi pipila amom wahupawa awaumi moloma awasi awausi.^o ⁵ Ea' awo undumafi nomonas awausi andeande'ma ogape bo'owa hilili' endilisi. Ea' undumafi ifagw awaugwi andeande' ma otopalopa amom mogoloma awasi awausi. Awo ondape lafela amom wahupawa awaumi. Awo ondanda' waf afamba hiafi bu'wafi hi'indalafa epes ina siti anin maol awauni awena sonda' basef Godi findiwaef, owa'atin.

Basef amom amam sa'umii

⁶ Ea' na'amba atin, ina' nesa'ma ukup amam amamba ata' sa'umi kwasakwasalai newa' banagama nomonas sopaom mugumafi alop andeande' datima.^p ⁷ Ina' atina nenda' waf bu'wafi atefa amom mutilina ma mugailina monda' waf hiafi fasifi. Maol inimba nigawalipa epes, ina' owa'i ni'if feloma basef awafia, owa'. Ni'ipas basef bu'wafi endilisifi atif. Okom ine'imi mopoma waf usi'ifi atefa nenda' maol inimba nigawalipas

J 1:13 1 Ti 4:7 **k** 1:14 Mt 15:11; Ro 14:20 **l** 1:15 2 Ti 3:5; 1 Jo 1:6, 2:4 **m** 2:1 Ta 1:9
n 2:2 1 Ti 3:11 **o** 2:4 Ef 5:22 **p** 2:6 1 Ti 4:12; 1 Pi 5:3

dondol.^q ⁸Ina' ninda'i basef usi'ifi atifa, anis epes ina siti anef waf awafi ma maol inimba, owa'. Ama esis bousi atiasi sogofa' ambagof awagufi. Dei' main, esis ina siti anef waf awafi ma afa' ma siga'i anif basef awafi, owa'.^r

Basefa epes isimba agof akasi sanda' maol dowadowafi

⁹Ina' a' ninda'ipa isimba agof akasi sanda' maol dowafi ni'ipas ni'i, esis some' basef agufumii silif sondafe' lafela amom. Ea' sondanda' maol bu'wani naninani hiani amom ukup paga'iani. Esis ina a' sogwa anif basefa agufumi sohalali'am, owa'.^s ¹⁰Esis ina a' sokwalopa anis hiahawes amamisi, owa'i. Esis sondaila basef amamifi andeande' datima. Ama atiasi esis sogafela agola basef ifi'i apa' magawalapefa esis epesi lu'wagol. Basef ifi'i Godi nowambilai apa' mutanimai mogape andeande'i.

Apa' mondape andeande' mosasa nemaf dembinai Kraisi

¹¹Apa' mogawa okom Godi lu'unai naganagaila ape'i ma nagatopalopapa dowafi anamba nataga nandawalap ea', epes hiasi misi'ah hiahi agufisi saloma agof akasi hi'alas satolona. Ama nofa' apa' amam nematawa nokwahomapa waf awafi mutanimai mogafe'ma anen.^t ¹²Waf God nagatopalopapa dowafafi fawalapa apa' ma mokwaha waf afamba mogowa' alafugaha Godi, ea' mokwaha nomonas amamba awami ma waf itapanai, apa' ukup pepe pendanda' pefe' andeande' mumafi alop ape'ipi mugaila waf Godi dei' nogota ata'e.^u ¹³Nogota atamba apa' mape masasa dagala anamba lu'unai mape mogohafanai. Aho', apa' mape mohafa glori banagami mogogala'i God Dembinai ape'inai nofa'apa mogotanimai, anen Jisas Kraisi anaf notaga nondawalap.^v ¹⁴Kraisi anen nakwaha ambal fasili ananili ma nagatala apa' natagwahepa ma waf aunai hianai mogosambala mu'uli Godi. Anen na'i nondombasa apa' ma mogataga epes ananipai atipa bu'upai, ukup pehafela monda' maol banagambela mogaila waf hiafi fasifi.^w

¹⁵Dondol ina' ni'ipasa basef ifimba. Ea' newa' banagasa sigailif ni'ipas dindinip si'i anona dembinai agol lu'wagilinai. Ea' nepa'aga waf nesa'ma ukup asasipi amam amamba owa' mugaila waf fasifia. Ae' andaiwa'ma anin epen niga'i ina' aman falafunai, owa'.

Apa' mundalutu banagepa ma waf fasifi

3 ¹Ina' dondol banagenama negasa'ma esis amam nematawa ma sogape lafela amom gavman dembami, amom banagami mugumafi esisi ma sogaila basef amamifi. Ea' esis sondandombola sonda' maol

q 2:7 1 Pi 2:15 **r** 2:8 1 Ti 6:1 **s** 2:9 Ta 1:3 **t** 2:11 1 Jo 2:16; Ef 1:4 **u** 2:12 1 Ko 1:7; Fl 3:20 **v** 2:13 Ga 1:4; Eks 19:5; Diu 7:6; Sam 130:8; Esi 37:23; 1 Pi 2:9 **w** 2:14 1 Ti 4:12

hiani fasini.^x ²Esis owa'i sonda' anin epen findiwana basef awafia. Esis ina a' sifitap, owa'i. Sope opalef awanelef. Dondol esis sogape sonda' waf sa'umbelifi atefa epes hiasi.^y

³Ina' negawa fowa' apa' wapani owa' anis nomonas be'esa, apa' mogosambala basefi ea' Satan nambaso'mapa. Apa' mape lafela waf naninani aunai nelelemb mogohafema maemaefah awami ma alop sonogahap. Apa' mafe' maloma waf anamba ukup aoma anis epesi ma kowagalapama hiahaom asasimi. Esis sofala apa' naumbih asasipai ea' apa' wapani manda' naumbih malomas.^z

⁴Apa' God, anen nofa'apa mogotanimai ea'i, anen alipunai apa' epesi okom maimailapa. Nogota atamba waf afamba ananifi afataga fendasali alihif,^a ⁵anen ina okom mandanda'ma anef waf usi'ifi apa' manda'afi, dei' nofa'apai, owa'atin. Nomonas uwahipimi ananiami atom nofa'apa mutanimai. Anen nasa'opapa ea' mataga awasi dambaipai, Ambal bu'unai Godi naso'apa ambal namili apa'.^b ⁶Ama maol Jisas Kraisi, anen aman nofa'apa mogotanimai, God naso'apa Ambal bu'unai ananinai nafi'hi hiana a'owa' ma apa' si'i nagakolo'wai banagami ma apa'.^c ⁷Anen nanda'as na'amba ma naga'i apa' epes be'epa hilili'i ma okom anamba Jisasi atona lu'unai naganagaila ape'i. Ea' nandandepapa ma mofa' ambal namili mogape andeande' lifilafi. Ea' apa' mahapifana mape mosasam.

⁸Basef ifimba endilisifi ma apa' hiapai mogahapifif. Ae' a'i newalapa basef ifimba ni'if dindinipa epes isimba sagahapifa God ea'i ukup pendanda'ma sugalutu banagesa waf fasifi. Basef ifimba ma Jisas Kraisi naloma God, ifimba bu'wafi ma feगतopalopa epes.^d

⁹Apa' basef amamba mamimami iwaniami esis sa'iama sogosambala waf fasifii, sa'i sondahihianama saga'i agof hiagufi bafasas akupas asasisii dowadowaf, sogafitapa mu'uli fowa' God nagaso' Mosesani, amambai ina' nindihi'amam. Dei' main, apa' mogawa amambai ina motopalopapa magawalapa anef waf bu'wafii, owa'.^e

¹⁰Epen mamahina nanda' esis Kristen sandawal sagataga biafisi, inimba negesambala basef bu'wafii. Ina' nisindi'amona nomonas ananisi dindinip atetef a'a bif. Ama anin owa' neme' basef ine'ifia, dao' nekwahin newa'an alafuga.^f ¹¹Ina' negawa epen na'ambaini a' nakwaha ufia'w fasi'wi ea'. Waf awafi ananifi fihimba'mapa mogawa anin epen awani.^g

Anif basef du'wanif akutaifi

¹²Anaf ae' i'i esapa' Artemas a'a Tikikus nogafe'mago ina', ina' ulal nifi'mai ae' mehip wambel ambalemba Nikopolis. Ina' negawa ae' a'ias

^x 3:1 Fl 4:5; Ro 13:1-7; 1 Pi 2:13-14 ^y 3:2 1 Ko 6:11; Ef 2:2, 5:8 ^z 3:3 Ta 1:3 ^a 3:4 2 Ti 1:9; Ef 5:26; Jo 3:5 ^b 3:5 Ap 2:17-18 ^c 3:6 Ro 3:24 ^d 3:8 2 Ti 2:14,16,23 ^e 3:9 Mt 18:15-17; 2 Jo 10 ^f 3:10 1 Ti 6:3-5 ^g 3:11 Ef 6:21-22

ea' ma igapani Nikopolis nogota atamba aotama asaf lu'wafi figalatai.^h
¹³Ina' numafi Senas nogogawa mu'uli esis Romi noloma Apolos
 andeande'. Ea' netopalopama hiahawes amom mofa'as mogafe' walemb
 hiagoma ma atiasi ina waowaola anis maefah ufa'w, owa'atin.ⁱ ¹⁴Ea' esis
 Kristen amam nematawa ape'isi sondalafa waf sugalutu banagesafi ma
 maol fasini naninani sogatopalopa epes isimba hiahawes akasi. Na'amba
 esis Kristen tol sope dowaf ea' ukup pese'asa sonda' waf bu'wafi Godi.

¹⁵Amam nematawa sape sagalome na'ai esis sandagala salomago ina'.
 Ina' nendagala nelomago epes mamahisa ukup pagapagaila afa'i sahapifa
 God sagalomafai. Ae' a'i God notopalopago ipa' dowaf nope nolomago
 ipa' hipai hi'ilipa nowa' banagaipa.

Basef ea' ma'uf.